

Badische Landesbibliothek Karlsruhe

Digitale Sammlung der Badischen Landesbibliothek Karlsruhe

Maneige royal, où l'on peut remarquer le défaut et la perfection du chevalier en tous les exercices ...

Pluvinel, Antoine

Paris, 1624

[Text]

[urn:nbn:de:bsz:31-143628](https://nbn-resolving.org/urn:nbn:de:bsz:31-143628)

arriere decosté, deçà, de là, & à vne place, en faisant vne courbette de costé en changeant tout en l'air retumboit de l'autre costé tant de fois que vous voulés. Iay nommé ce Maneige, la sarabande, du Bonnitte que nous n'auons iamais veu faire qu'à luy quād vous estiés dessus, & pour conclusion les excellentes passades releuées avec la grace, & la beauté du cheual en toutes ses actions, & tout cela en presence de Monsieur le Connestable, qui fut grandement en admiration de veoir vne si grande, & iuste obeissance à ce cheual, en tous ces Maneiges, mais il eust receu beaucoup plus de contentement s'il eust veu cōme nous auons veu le fauteur: le courtault du monde le plus beau que vous m'aués dressé, qui manioit parfaictement de quatre sorte d'airs à capreoles, à vn pas vn sault, à courbettes, & terre à terre, & si scauant qu'il changeoit d'air a mesme temps selon la volonté du Cheualier, qui le faisoit manier, sans luy desrober vn seul temps des autres airs, tant il estoit parfaict en obeissance, & non moins en force, & en disposition, car vous aués compté quatre-vingt trois capreoles qu'il a faiçtes sous le sieur de Betbese, qui estoit encores page, toutes d'vne haleine, & avec tant de gayeté qu'il en eust peu bien faire beaucoup dauantage si vous eusiés voulu, en quoy ie loüe fort vostre coustume de ne desirer rien tirer du cheual, qu'à peu près de la moitié de ce qu'il peut faire en maniant, & la treuue appuyee d'vne tres-bonne raison, qui est que faisant autrement, le Cheualier, & le cheual, perdent

toute

toute leur bonne grace, pource que si le cheual vient a s'affoiblir de force, & d'haleine en maniant, il faut necessairement que les aydes du Cheualier soient plus grandes & plus apparentes, tellement qu'il est tout certain que tous les deux par cemoien perdent leur bonne contenance en leur action, voyla pourquoy, de crainte de tomber en cest inconuenient on voit Monsieur de Pluvinel estre tousiours en mesme posture, droict à cheual, soit qu'il le face manier, où aller le pas, & ie luy ay ouy dire assez souuent que le Cheualier pour auoir bonne grace, en faisant manier son cheual, ne doit point remuer, que tout doucement le bras de la housse, en la faisant siffler haut & bas deçà delà, comme il dira cy-apres, n'y faire paroistre les autres aydes pour faire iuger à ceux qui le regardent que son cheual, est si gentil & si bien dressé qu'il va tout seul de sa bonne volonté, & quasi par diuinité: il a raison, Sire, car veritablement comme cela, c'est la perfection du Cheualier, & du cheual.

LE ROY,

Il est vray, ie l'ay bien remarqué, & pour ce ie veux scauoir de vous Monsieur de Pluvinel tout ce qu'il faut obseruer pour faire de mesme, car vous n'estes qu'homme comme vn autre.

PLUVINEL

Il sera fort facile à Vostre Majesté, de le comprendre, & de le mettre en ceuvre, Dieu vous

S

MANEIGE ROYAL,

ayant donné autant, ou plus que à nul autre Prince du monde vn corps si accompli, & doué d'un grand & ferme entendement, il n'y aura qu'à faire en sorte que tous vos cheuaux soient choisis dignes d'un maistre si parfait: car quand ils seront gentils, bien adroictés, & sensibles, Vostre Majesté les fera manier avec l'ayde de la cuisse seulement, & vn peu de la langue, qui est comme l'esperon de l'esprit, dont nous vfons pour releuer les cheuaux en maniant, & puis de la main de la bride, mais que ce soit si doucement que l'on ne s'en puisse apperceuoir, en la laschant, en la retirant, ou la tournant selon vostre volonté, laquelle doit estre tousiours conduite par vostre bon, & incomparable iugement: & si le cheual vouloit faire le paresseux vos esperons peuuent arriuer d'un mesme temps au ventre à toutes les battues, & iusques au sang s'il est de besoing selon vostre discretion, soit de l'un, ou de l'autre costé ou de tous les deux, sans toutesfois remuer aucune partie du corps que le bras droict à cause de la housine qui est tenue de la main droicte, que vous mettrés tout doucement vn peu en trauers sur le col du cheual, afin qu'il l'apperçoie de l'œil gauche, & incontinent la changer de place, & l'approcher de sa ioué droicte, puis luy donner apres trois petits coups sur vne de ses espauls, autant sur l'autre, & vn coup sur le ventre des deux costez, fort pres de la botte, puis l'ayant faicte siffler haut, & à bras estendu la laisserés passer sur vostre espaul droicte, & en fin tomber sa poincte

dessus

DE M. DE PLVVINEL. 12

dessus la croupe du cheual, sans l'arrester que fort peu en chascque place, de toutes ces aydes de la housine, ainsi l'on fera veoir que le cheual peut estre ayde de bonne grace, & en toutes façons, sans aucun embarras ny empeschement.

LE ROY.

Je suis fort satisfait d'auoir entendu comme vous auez sceu reduire à la raison vn cheual si fascheux, & indomptable au iugement d'aucuns des plus experts & scauans cheualiers, & les moyens d'ayder proprement les cheuaux, en maniant de la housine, des esperons, de la main, de la bride, de la langue, & de la cuisse, qui est la plus delicate, & volontiers la plus mal-aysee à faire comprendre à l'homme, & encores plus au cheual: il me semble que ce sont toutes les Aydes que l'on peut donner aux Cheuaux de Maneige: mais ie veux scauoir de vous les moyens que vous tenez, & les parties que vous desirez au Cheualier, & en quelle posture il se doit tenir, pour le rendre parfaitement bel homme de Cheual, c'est à dire pour auoir tousiours bonne grace quand il est à Cheual.

PLVVINEL.

Il faut, Sire, que l'Escolier soit homme, & non pas beste habillé en homme, & qu'il aye deux choses principalement, la taille belle & aisee, pour estre bien libre en toutes ses actions à cheual, & puis bonne volonté d'apprendre: car ayant ces deux parties, comme Monsieur de Termes, le plus scauant à Cheual,

Figure 3.
G